

**Siusinaartumik pensionisiat pillugit Inatsisartut
inatsisaata allanngortinneqarnera pillugu Inatsisartut
inatsisaat
(Qaffasinnerpaamik siusinaartumik pensionisianik
pisartagaqartunut tunngaviusumik
pensionisiaqartarnerup atulersinneqarnissaa,
siusinaartumik pensionisialinnut kapitali 7-imi
ikaarsaarnissami aalajangersakkami pineqartunut 20
pct.-imut malittarisassap atulersinneqaqqinnissaa,
angalanermi aningaasartuutit naleqquttut pillugit §
29, imm. 1-ip erseqqissarneqarnissaa aamma § 33,
imm. 3, aamma § 36 inatsisip kalaallisut oqaasertaani
naqqiineq)**

§ 1

Siusinaartumik pensionisiat pillugit Inatsisartut inatsisaanni nr. 40-mi, 9. december 2015-imeersumi, Inatsisartut inatsisaatigut nr. 19, 28. november 2016-imi allanngortinneqartumi, tulliuuttut allannguutigittinneqassapput:

1. § 17, imm. 3 ima oqaasertaliorneqassaaq:

” Imm. 3. Siusinaartumik pensionisiaqarnermi pisartakkat appartinneqassapput, siusinaartumik pensionisiaqartoq aammalu aappaqarsimaguni aapparisaata ukiumoortumik isertitarisaat, tamatumani ilanngunnagit siusinaartumik pensionit, utoqqalinermi pensionisiat aammalu Inunnut Isumaginninnikkut isumannaallisaaneq pillugu Nunat Avannarliit isumaqatigiissutaat malillugu 28.000 kr.-it sinnerpatigit. Aappaqarsimaguni aapparisaata isertitai siulliit 100.000 kr.-it ilanngunneqassanngillat.”

2. § 17-imi imm. 3-p kingorna imm. 4-tut nutaatut ilanngunneqassaaq:

” Imm. 4. §17, imm. 2 naapertorlugu, siusinaartumik pensionisiallit pisinnaatitaapput tunngaviusumik pensionisiani qaffasinnerpaamik siusinaartumik pensionit 50 %-iinik pisassallutik, aappaqarsimagunik aapparisaata piffissami pineqartumi tamakkiisumik isertitariunnagaasa annertussusii apeqqutaatinnagit. § 17, imm. 2 naapertorlugu, tunngaviusumik pensionisiat appartinneqassapput, siusinaartumik pensionisiallipaappaqarsimagunilu aapparisaata ukiumut tamarmiusunik piffissami pineqartumi

isertitaasa, siusinaartumik pensionisiat, utoqqalinersiat pensionisiallu Inunnut Isumaginninnikkut isumannaallisaaneq pillugu Nunat Avannarliit isumaqatigiissutaat malillugu akiliutigineqarsimasut, ilanngunnagit, 28.000 kr.-t, qaffasinnerpaamik pensionisiat 50 %-ii ilanngullugit, sinnerpatigit. § 15 imm. 4. Naapertorlugu, § 17, imm. 6 atorineqassanngilaq, appartitsisoqassaaq appasinnerpaamik siusinaartumik pensionisianut aningaasanut killiliussat assingi malillugit.”

Imm. 4-5 tamatuma kingorna imaalissaaq imm. 5-6.

3. § 29, imm. 1 ima oqaasertaliorneqassaaq:

” Inummut tapit kommunalbestyrelsimit akuersissutigineqartarput inuit ataasiakkaat pisariaqartitaat nalilersuiffigineqareernerisigut soorlu imaattut:

1) ingerlaavartumik pisartakktut sivisunerpaamik ukiumut ataasiakkaarlugit aalajangersarneqartunik, imaluunniit

2) immikkut pisariaqartitat matussuserniarlugit ataasiarluni ikiorneqarneq, ilaatigut makkununga:

a) isarussat,

b) atisat,

c) pequtit,

d) Kalaallit Nunaata iluani angalanermut aningaasartuutit naleqquttut, aamma

e) ataasiaannarluni aningaasartuutit aallat pisariaqartutut naatsorsuutigineqartut.”

4. § 29-imi imm. 1-p kingorna *imm. 2-tut* nutaatut ilanngunneqassaaq:

“ *Imm. 2.* Kalaallit Nunaata avataani angalanernut ataasiaannarluni ikiorsiissutinik tunisisoqarsinnaanngilaq.

5. § 33, imm. 3 ima oqaasertaliorneqassaaq:

” *Imm. 3.* Siusinaartumik pensionisiaqartinneqartuppaasissutissiisussaataaneq sumiginnarsimaguniuk imm. 1 malillugu ilisimaarinninnini imaluunniit ilisimaarinnittariaqarnini naapertorlugu, eqqunngitsumik tunngaveqarluni siusinaartumik pensionisiasanik pissarsisarsimaguni, taava eqqunngitsumik tunngaveqarluni pissarsiarisimasani utertittussanngussavai. Tamatuma saniatigut kommunalbestyrelse pisinnaatitaavoq ingerlaavartumik pensionisarineqartunit allaninngaanniit matussusiissalluni, tamatumanili pineqaratik meeqqanut tapisiat.”

6. § 36 ima oqaasertaliorneqassaaq:

” **§ 36.** Kommunalbestyrelsip nalilerpagu siusinaartumik pensionisiaqartoq nammineq a-ningaasaatiminik aqutsinnaanngitsoq, aalajangiisoqarsinnaavoq siusinaarluni pensionisiat tunniunneqartarnerinik aqutsisoqarnissaa, uani ilaallutik inummut namminermt tapit aamma meeqqanut tapit tunniunneqarneri. Taamatut aalajangiinerup nassataraa, kommunalbestyrelsi aalajangiisinaasoq inunnut ataasiakkaat pensionisiat tunniunneqartarnerannut atatillugu nalinginnaasumik maleruagassat ileqqullu atorineqartut avaqqullugit tunniussisarnissaminut, taamaasiornikkullu qulakkeerniarneqassasoq siusinaartumik pensionisiaqartup inuuniarnermini aalajangersimasumik akilertakkani akilertarlugillu saniatigut inuussutissaqarnissaminut akissaqartassasoq.”

7. § 43-imi imm. 8-p kingorna *imm. 9-tut* nutaatut ilanngunneqassaaq:

” *Imm. 9.* § 17, imm. 2 naapertorlugu, siusinaartumik pensionisiallit, taakku ilagalugit siusinaartumik pensionisiallit Inunnut Isumaginninnikkut isumannaallisaaneq pillugu Nunat Avannarliit isumaqatigiissutaannut ilaasut, siusinaartumik pensionisiat qaffasinnerpaartaasa 20 procentiinik pisassapput, aappaqarsimaguni aapparisaata piffissami pineqartumi isertitarisartagaat tamarmiusut apeqqutaatinngagit.”

Imm. 9 - 10 tamatuma kingorna imaalissaaq imm. 10 - 11.

§ 2

Inatsisartut inatsisaat atuutilissaaq ulloq 1. januar 2018.

Naalakkersuisut, ulloq 23. november 2017

Kim Kielsen

Namminersorlutik Oqartussat

Imaneq 4

3900 Nuuk

E-mail: nsninatsit@nanoq.gl

Linkit iluaqutaasussat

Kalaallit Nunaanni inatsisinut nalunaarutit

Namminersorlutik Oqartussat inatsisinut toqqorsiviat

Naalakkersuisut